



Iacobus Landaeus in Bauaria natus & educa-
 tus est. Is cum felici ingenio esset præditus, mul-
 tis artibus simul incubuit, atq; præclaram Philoso-
 phiæ, Mathematicæ, & Theologiæ eruditionē sibi
 comparauit, ita ut non tantum apud Germanos,
 sed etiã exteras nationes plurimum innotesceret.
 Hinc factum ut Ingolstadtij professor constitutus,
 eam scholam multum auxerit & exornarit. scripsit
 is librum De constructione solidæ sphaeræ, atq; in
 Proclum scholia. præterea in C. Plinij De naturali
 historia librum secundum commentarium edidit,
 quo difficultates Plinianæ, præsertim Astronomi-
 cæ, omnes tolluntur. Terræ sanctæ quoq; situm &
 naturã cum tabulis proposuit, & alia maritima Germaniæ uersus Septentrio-
 nē loca illustrauit. scripsit etiã de rebus Indicis, præterea in Genesin & Exodũ
 doctissima cõmentaria. De arbitrio humano: de raptu Pauli in tertiũ cœlum:
 de solenni festo Paschatis, & cõmentaria in historiã Iudith, cũ alijs huiusmodi,
 quibus ingenij sui monumēta ad posteros trãsmisit. Cum hoc modo Iacobus
 in magna authoritate esset, tãdem anno 1549 multorum luctu apud suos Baua-
 ros obiit, & honorificè terræ mandatus fuit. Con. Gess. Anon.